

樂城集

有蔬羹水亦已乾

孟清博餘



樂城集卷之十六

宋眉山蘇轍子出著

明東吳王執禮子敬  
顧天叙禮初全校

詩一百二十首

程之元表弟奉使江西次前年送赴楚州韻戲別

送君守山陽羨君食淮魚送君使鍾陵羨君江上居  
憐君喜爲吏臨行不欲歔紛紛出歌舞綠髮照瓊梳  
歸鞍踏涼月倒盡清樽餘嗟我病且衰兀然守文書  
齒疎懶食肉一飯甘青蔬愛水亦已乾塵土生空渠  
清貧雖非病簡易由無儲家使赤腳嫗何煩短轅車

君船繫東橋茲行尙徐徐對我竟不飲問君獨何歟

表弟程之邵奉議知泗州

馬有千里足所願百里程馬心自爲計安用終日行何人志四方  
欲買千金輕吾弟有儁才見事心眼明二年坐北部萬口傳佳聲  
談笑頑狡伏何曾用敲榜艱難得銅虎洗眼長淮清民事不足爲  
但當食魚烹貧重貴餘力過飽多傷生不見大路馬垂頭畏繫纓

次韻子瞻書黃庭內景卷後贈蹇道士拱辰

君誦黃庭內外篇本欲洗心不求仙夜眎片月墮我前黑氛剝盡  
朝日妍一暑一寒久自堅體中風行上通天亭亭孤立孰傍緣至

哉道師昔云然旣已得之戒不傳知我此心未虧騫指我嬰兒藏  
谷淵言未絕口行已旋我思其言夜不眠

次韻子瞻好頭赤

沿邊壯士生食肉小來騎馬不騎竹翩然赤手挑青絲捷下巔崖  
試深谷牽人故關榆葉赤未慣中原暖風日黃金絡頭依圍人俛  
聽北風懷所歷

送葆光蹇師遊廬山

建城市中有狂人縱酒罵市無與親敲門訪我何逡巡頭蓬面垢  
氣甚真截河引水登崑崙下洗尺宅骨髓勻告我入室要自門仙

翁道師豈遺君歸來插足九陌塵獨遊凝祥芳草春蕭然孤鶴鳴  
鷄羣子欲不死存谷神海山微明朝日暎丹成寄子勿妄云出入  
無朕窮無垠相思一笑君乃信

同子瞻次梅聖俞舊韻題鄉舍木山

江槎出沒浮犀牛波濤掀天谷爲洲江寒水落驚霜秋危根瘦節  
鳴寒流脆朽吹去誰鑄鏤連峯疊嶂立酋酋吾家此山不易得十  
年棄置空自尤猿號鶴淚豈無意委蛇怪我懷羔裘西歸父老拍  
手笑笑憶翁子躬薪樵去時三山今有五不問故園惟一丘

次韻子瞻送千乘千能

少年食糠覈吐去願一官躬耕遇斂獲不知以爲歡謂言一飛翔  
要勝終屈蟠朝廷未遑入江海失所安多憂變華髮照影慙雙鸞  
恩從萬里歸獨喜大節完日食太倉米篋中有餘紕奇窮不當爾  
自信處此難長女聞孀居將食淚滴槃老妻飽憂患悲吒摧心肝  
西飛問黃鵠誰當救飢寒二子憐我老輦致心一寬別久得會合  
喜極成辛酸忽聞倚門望有書驚歲闌深情見緩急欲報非琅玕  
勸爾勤孝友慎毋慕衣冠淵渟自成井放瀉當生瀾豈有白雪駒  
舉足無和鑿

題王詵都尉畫山水橫卷三首

摩詰本詞客亦自名畫師平生出入輞川上鳥飛魚泳嫌人知山  
光盎盎著睂睫水聲活活流肝脾行吟坐詠皆自見飄然不作世  
俗詞高情不盡落縑素連峯絕澗開重帷百年流落存一二錦囊  
玉軸酬不訾誰令食肉貴公子不學父祖驅熊羆細氈淨几讀文  
史落筆璀璨傳新詩青山長江豈君事一揮水墨光淋漓手中五  
尺小橫卷天末萬里分毫釐謫官南出止筠穎此心通達無不之  
歸來纏裹任紈綺天馬性在終難羈人言摩詰是前世欲比顧老  
疑不癡桓公崔公不可與但可與我寬衰遲

憐君將帥雖有種多君智慧初無師篇章俊發已可駭丹青妙絕

當誰知自言五色苦亂目況乃盲酒長傷脾手狂但可時弄筆口  
病未免多微詞歌鐘一散任池館幅巾靜坐空書帷偶從禪老得  
真趣此身不足非財訾世間翻覆岸爲谷猛獸相食虎與羆逝將  
得意比春夢獨取妙語傳清詩眼看宮釀瀉酥酪未與村酒分醇  
漓解鞍駿馬空伏櫪寄書黃狗閑生釐江山平日偶有得不自圖  
寫渾忘之臨窗展卷聊自適盤礴豈復冠裳羈欲乘漁艇發吾興  
願八野寺嗟兒癡行纏布襪雖已具山中父老應嫌遲

我昔得罪遷南夷性命頃刻存篙師風吹波蕩到官舍號呼誰復

相聞知小園畜蟻防橘蠹

橘性甘多蠹南人畜蟻於園中蟻緣木食蠹雖鄰家柯葉相接而蟻不相過亦

一異  
耳 空庭養蜂收蜜脾讀書一生空自笑 賣鹽竟日那復詞城中

清溪可濯漱城上連峯堪幕帷十千薄俸聊足用魚多米賤憂無  
訾東坡居士最岑寂岌然深藪見狐熊坐 隅止鵬偶成賦槃中食  
蟄時作詩憐君富貴可炙手一時出走羞 啜醕澤傍憔悴凡幾歲  
胸中芥蒂無一釐江山別來今久矣不獨 能言能畫之同朝執手  
不容久笑我野馬方受羈袖中短卷墨猶 濕傍人笑指吾儕癡方  
求農圃救貧病它年未用譏樊遲

次韻子瞻十一月旦日鎖院賜酒及燭

銅環玉鎖閉空堂腕脫初驚筆札忙紅燭遙憐風雪暗黃封微瀉

桂椒香光明坐覺幽陰破溫暖深知覆青長明日白麻傳好語曼  
聲微繞殿中央

送周正孺自考功郎中歸守梓潼兼簡呂元鈞三絕

白髮熙寧老諍臣凜然心膽大於身吾儕坐看鴻唐去誰起雲中  
廢棄人

十年符竹守吾州故吏相逢嘲土牛毋謂徐公不堪用諸人自與  
世沉浮

東道如聞近稍安乘驄按部凜生寒忽逢太守能相下俱是從來  
言事官

雪中訪王定國感舊

昔游都城歲方除飛雪紛紛落花絮徑走城東求故人馬蹄旋沒  
無尋處翰林詞人呼巨源笑談通夜倒清樽住在城西不能返醉  
臥吉祥朝日瞰相逢卻說十年事往事皆非隔生死惟有飛雲似  
昔時許君一醉那須起蘭亭俛仰迹已陳黃公酒壚愁殺人君知  
聚散翻覆手莫作吳楚乘朱輪

次韻王定國見贈

枯木無枝不記年寒灰誰遣強吹然南遷不折知非妄未老求閒  
愈覺賢屢出詩書新管籥偶開畫卷小山川簿書填委慙君甚撥

去歸來粗了眠

王子難龍圖挽詞

帝子乘鸞已列仙遺芳留得眾孫賢  
俊科蚤與寒儒競禁從終償  
白髮年輦路聯鑣驚往事圃田回首泣新阡  
舊聞推歷知天命看  
熟黃梁定洒然

次韻李參秀才來別子瞻仍謝惠馬二首

小床臥客笑元龍彈鋏無輿下舍中五馬不辭分  
後乘輕裘初許  
敝諸公隨人射虎氣終在徒步白頭心頗同遙想據鞍橫槊處新  
詩一一建安風

呂司空挽詞三首

少年輕富貴一意在詩書共恨經綸晚纔收老病餘寡言知德勝  
善應本中虛卒相承平業謳歌元祐初

其二

將相家聲近勲名晚歲隆給扶安舊德賜府壓羣公不見彌縫迹  
空推翼戴功山公舊多可寒士泣清風

其三

罷郡來清潁微官憶宛丘顏垣那可住隱几若將休復起民欣願  
全歸天不畱世間反覆手有德竟無憂

公罷潁川退居於陳轍  
爲陳學官時請見焉

范蜀公挽詞三首

能言人盡爾有立世終稀憂國常先衆謀身亦勇歸見奇初或笑  
要極未應非僅似西山老終身止食薇

其二

賦傳長嘯久書奏鏘鐘新共歎文章手終爲禮樂人遺風滿臺閣  
好語落簪紳欲取褒雄比終非骨鯁臣

其三

劒外東來日城西卻住年高齋畱寓宿旅食正蕭然語語慙聞投石  
詩新看涌泉清樽寄苦淚一洒葉墳前

續切集卷之十六  
范百嘉百歲昆仲挽詞二首

少年何斂銳才氣伏諸生展卷五行下揮毫萬字傾百年殊未艾  
一病竟無成誰謂從夫子同開鬱鬱城

其二

季子尤高爽顏家早哭回白頭生便爾黃壤遽相催舊草誰收拾  
新松剩挿栽悲傷有伯氏諸子尙嬰孩

安厚卿樞密母夫人挽詞二首

家起側微中身兼富貴終慈仁本宜壽勤約自成風大府寧居久  
名邦賜沐雄共傳生子福仍指讀書功

其二

早歲參戎幙開門對粉牆初聞寡兄弟共羨好姑章一別飛騰速  
全歸福祿長遺芳在子舍它日望巖廊

題李公麟山莊圖

弁叙

伯時作龍眠山莊圖由建德館至垂雲泚著錄者十六處自西  
而東凡數里巖嶠隱見泉源相屬山行者路窮於此道南溪山  
清深秀峙可游者有四曰勝金巖寶華巖陳彭漈鵲源以其不  
可緒見也故特著於後子瞻旣爲之記又屬轍賦小詩凡二十  
章以繼摩詰輞川之作云

建德館

龍眠淥淨中微吟作雲雨幽人建德居知是清風主

墨禪堂

此心初無住每與物皆禪如何一丸墨舒卷化山川

華巖堂

佛口如瀾翻初無一正定畫作正定看於何是佛性

雲薌閣

清溪便種稻秋晚連雲熟不待見新春西風薌自足

發真塢